

VLA. Urk. 8486
23. Dezember 1540

Ich Leonhart Ruch zu thorenbüren gesessen bekhen öffentlich und thun khund allermengklich mit dißem offen Brieff das ich als ein Mitt Rechtgesezter vogt Margaretha faslerin Jos albrichs söligen verlasne witwe auch zu thorenbüren gesessen von Jer des besten nutz wegen Recht und Redlich und ains stätten Ewigen Khoffs Hirmit Ime kofe ditz Brieffs zu khauffen geben heb dem Edlen und vestenn Juncker Hanßen von Emps zu der Hohen Emps stifter der Pfrund ald Cappell Im Oberdorff gelegen zu thorenbüren und allen sinen Erbenn und nachkomen ald Inhaber der gedachten Pfrond Dreisig schiling Pfennig Rechts satz Jarlichs und gewis Ewigs Zins und geltzs vonn düßer und ob gemelter meiner vogt thochter aigen Hauß Hofstat und Rebwachs obna und unna daran gelegen stosßend obna an Joß Albrichs deß ammaß Erben neben zu an Frick Albrichs Erben unna an Michel Albrichs Erben zum vierden ann die Baugasßen und ann mein Lenhart Raüchen gut ist vormals fry Ledig und loß doch ist der thorgkel hindan gesetzt allain und ist disr Ewig khoff beschechen und volführt worden umb Drisig Pfund Pfennig guter und genemer ditz landswering den mein vogt thochter voligkhlich also bar aufgericht und bezalt ist noch wem besten nutz und willen also sellend und welend gedachte mein vogt thochter ald wie Erben ald Inhaber ditz Hierin begrifen underpfand die vorgemelten Drisig schiling Pfennig Jarlichs Zins darauß und darab Hinfür Ewigklich und Jarlich auch Jedes Jars allain und besonder alweg auff sant marthis Tag acht Tag vor ald nach gütlich und thugentlich Richten und geben zu der gedachten Cappell stifter ald pfleger ald Inhaber der obgemelten Pfrundt sulen anhanden und Gewalt antwurten und geben gentslich onne minderung und Abgang und onne allen iren Costen und schaden und so und wan ich als ain Vogt ald main Vogt thochter ald irer Erben ald Inhaber des vorgedachten Underpfand hierin sümig würden und disen Zins nit richten und geben tun all weiß und maß wie obstat so sind und Hausend won disse Zwain begriffen Underpfand Zinßfelig und zu Rechtem Ewigen Eigen gefallen und und verfallenen der oppgemelten Pfrund daß alle khünftig Inhaber der gedachten Cappell ald stifter Es sölend und mügen Inloben danvon nützen und nießen und damit schaffenn thun und lassen alß mit der uffgemelten andrem Irem aigen gut onne mein meiner Vogt thochter alle unser Erben und nachkhomen Jümen nach Jaren weder mir noch onne gericht gaistlich und weltlich Inn khain weiß noch weg Es söllend und wellend auch meinen Vogt Ihmler und alle Irer Erben ald Inhaber des gedachten underpfands hierauff ditz khaufs Recht gut getrew weren Haißen und sein für All abgeng Irrung und Infäl nach dem Rechten alweg Inn unsren khosten und onne Ieren mangel und schaden und wie woll dieser Brief ainen Ewigen khauf weiset ist mit denocht die gnad beschechen daß mein vogt thochter ald irer Erben ald Inhaber deß vorgeschribnen Underpfands disen obgeschribnen Zins wol wider khaufen und oblaßen megen Halb oder gar zu mal doch alweg mit dem Hoptgut und mit den Erloffnen und unbezalten Zinsen doch alweg auff den bestimpten sant marthis tag wen nit Endrung Inn der müntz ist und des alles zu warem vestem Urkhund und Zu gutter sicherhait so hab ich Lenhart Rauch für mich und mein Vogt thochter mit Vleiß Und Ernst gebetten und Erbetten den Ersamen und weisen Hansen geiger der Zeit unser gnadigen Herschaft österrich irer amman zu thorenbüren daß Er sinen aigen Insigel offenlich hat gehenckt an dißem Brief doch der Herschaft Im und seinen Erben auch Ime als ain vogt außserhalb der vogthey onne schaden der geben ist auff Donstag näst nach sant thomaß Tag Nach Cristus gepurt gezelt Fünfzechenhundert und darnach Inn dem vierzigisten Jar.

23. Dez. 1548

Rückseite:
Der Pfrond Im Oberdorf
Lienhart Rauch zu Dorenbieren, Zinß 1lb 10ßd

Disser Brief Ist In Cräfften Zinst Jetz Hanß Luger Yörgen sonne Halb das Ander halb Marthin wechinger Allß Vogt Amma wechingers Kinder auch den halben Thail.

Jerg Wehinger ama, und (...?) fol. 20